

السلام عليكم ورحمة الله وبركاته

الحمد لله وكفى وصلاة سلامًا على عباده الذين اصطفى اللهم لك الحمد كله ولك الملك كله وببيدك الخير كله وإليك يرجع الأمر كله ، اللهم صلي على عبدك ونبيك محمد صلى الله عليه وسلم في الأولين والآخرين وفي كل وقت وحين أما بعد ،،  
إخواني وأخواتي في الله طلبة السنة الأولى والسنة الثانية في المعهد القرآني الدعوي وعموم إخوانا وأخواتنا وشبابنا وبناتنا ربنا يبارك فيكم وربنا يحفظكم في موسوعة الفتن اللقاء رقم 11 في تفسير سورة العنكبوت وفي وقفات مع يعني مشاكل بداية الإلتزام وفتن بداية الطريق ومشاكل خطوة أولى إلتزام في دورة خطوة أولى إلتزام وفتن بداية الطريق المرة اللي فاتت في اللقاء العاشر اتكلمنا يا جماعة عن ... لأن النهاردة اللقاء بتاع النهاردة مبنى على اللقاء بتاع المرة اللي فاتت .  
النهاردة هنتكلم على قول الله : **" مَثَلُ الَّذِينَ اتَّخَذُوا مِنْ دُونِ اللَّهِ أَوْلِيَاءَ كَمَثَلِ الْعَنْكَبُوتِ اتَّخَذَتْ بِئِنًّا "** الآية اللي السورة كلها متسمية باسمها يبقى لازم نركز كويس جدا في لقاء النهاردة ، اللقاءات اللي فاتت كلها كانت يعني اللقاء اللي فات كنا بنتكلم عن إن قصص الأنبياء اللي في سورة العنكبوت عبارة **عن 4 كلمات :**

- الكلمة الأولى : عروض بطولية ، عروض بطولية من الأنبياء
- الكلمة الثانية: تهديدات مرعبة أهل الباطل مسكتوش دا هددوا تهديدات مرعبة
- الكلمة الثالثة: نجاة مذهلة يعني المفروض قصاد التهديدات دول الأنبياء دول كانوا هيتفرموا الأنبياء خلاص الواقع كله بيقولهم لازم هنفرومكم **" اَقْتُلُوهُ أَوْ حَرِّقُوهُ "** يبقى نجاة مذهلة.
- الكلمة الرابعة: هلاك مفاجئ، هلاك مفاجئ لأهل الباطل

### عروض بطولية

- سيدنا نوح 950 سنة المرحلة الجهرية في حياة سيدنا نوح مكانتش 3 سنين يعني زى عندنا في الإسلام ده 950 سنة ولا يكل ولا يمل عن الدعوة
- سيدنا إبراهيم خارج من النار يتكلم عن ربنا
- سيدنا لوط رايح سدوم وعمورية يتكلم عن ربنا وسط قرية كلها مسجلين خطر وسط قرية منسوب المعصية فيها لم يحدث في تاريخ البشرية من قبل يعني مفيش تمرين مشهور يعني معندوش تجربة سابقة لنبي تعامل مع هذه المعصية بيتعامل مع واقع لم يحدث في تاريخ الكرة الأرضية من قبل من الفجور اللي وصل ليه الناس ومع ذلك يتجوز منهم ويفضل لحد ما يخلف وبناتوا يبقوا عرايس وهو صابر على هذه القرية الخطيرة من أجل الله .

يبقى أول حاجة عروض بطولية وقصاد العروض البطولية دي تهديدات مرعبة " **أَفْتُلُوهُ أَوْ حَرِّقُوهُ** " مش احرقوه حرقوه حَرِّقْ على وزن فَعَلَ، فَعَلَ صيغة فَعَلْ تفيد الكثرة وتفيد التكرار وتفيد الشدة يعنى شوفوا الغل اللي في قلوبهم على سيدنا إبراهيم وعلى أي حد بيتكلم عن الدعوة يبقى تهديدات مرعبة.

### النقطة الثالثة نجاة مذهلة

" **فَأَنْجَيْنَاهُ وَأَصْحَابَ السَّفِينَةِ** " كلمة النجاة شوفوا مكررة فى السورة " **فَأَنْجَيْنَاهُ وَأَصْحَابَ السَّفِينَةِ وَجَعَلْنَاهَا آيَةً لِلْعَالَمِينَ** " نجاة مذهلة محدش كان يتوقع إن سيدنا نوح ينجو ، إن سيدنا إبراهيم ميتحرقش وميخرجش من النار حته فحمة محدش كان يتوقع إن سيدنا لوط هيخرج من سدوم سليم لا يمكن حد في البشرية كان يتخيل إن ده يحصل ، يبقى نجاة مذهلة .

وبعد كده هلاك مفاجئ للباطل " **فَكُلًّا أَخَذْنَا بِذَنْبِهِ** " فَكُلًّا ولا واحد فلت ولا عاصى فلت من ربنا ولا مجرم فلت من إنتقام ربنا **فَكُلًّا أَخَذْنَا بِذَنْبِهِ فَمِنْهُمْ مَنْ أَرْسَلْنَا عَلَيْهِ حَاصِبًا وَمِنْهُمْ مَنْ أَخَذَتْهُ الصَّيْحَةُ وَمِنْهُمْ مَنْ خَسَفْنَا بِهِ الْأَرْضَ وَمِنْهُمْ مَنْ أَغْرَقْنَا** " الكل بقى مثلى الكل بقى عبرة الكل اتكل بيه .

يبقى إذن الحلقة اللي فاتت خدنا منها هذه العروض البطولية والإنتقام المروع من اللي حاربوا هؤلاء الأبطال اللي هم الأنبياء اللي هم أهل الحق ، النهاردة بقى يا جماعة هناخد الإستخلاصات المهولة من هذه القصص من التلت التالى بتاع سورة العنكبوت اللي هو السكشن اللي هو..إحنا قلنا سورة العنكبوت تلات تتلات

- **التلت الأولانى:** اللي هو الفتن الخارجية أهل الباطل وافقين فى وشك والدك وولدتك وافقين فى وشك الفتن الخارجية .
- **والتلت التالت** الفتن الداخلية الشبهات بقى دخلت على موقع نصارى قمى لطشة شبهة فضلت لفاك دماغك سنه سنتين زائد الخوف على الرزق الخوف على الأمن الفتن الداخلية
- وما بين الفتن الخارجية والداخلية قلنا **التلت اللي فى النص** السكاشن العروض البطولية لأهل الحق اللي رغم كل قصف النار بتاع الفتن ده أدوا أداء بطولى مش بس كان كل مهمم الثبات أو كل مهمم النجاة من الفتن أو عدم الانتكاس ده وسط قذف نار الفتن ده كانوا بيأدوا عروض بطولية مذهلة .

وقلنا إن اللي جه فى الأول المعوقات الخارجية قبل الداخلية فى الآخر لأن الأصعب هو الداخلية فالداخلية اتسابت للآخر بعد قصص الأنبياء وبعد السكاشن بتاعت عروض الأنبياء المبهرة عشان بعد بقى ما فهمت الحقيقة كلها وفهمت إزاي إن ربنا لا يمكن يسبب أهل الحق وفهمت إن أهل الباطل هم اللي بيتمسكوا فى الآخر بعد ما خدت شحنة حب لله وشحنة تعلق بالله وشحنة ذبح للمخلوق من القلب معادش فى خوف من مخلوق بعد التلت النصانى التلت الثانى فى سورة العنكبوت معادش فيه تعلق بمخلوق معادش فيه رغبة إلى مخلوق المخلوق ادبح من القلب فى التلت الثانى من سورة العنكبوت بعد كل ده بقى نورت آه نورت بعد ما هناخد الإستخلاصات اللي هناخدها النهاردة بقى إن شاء الله بإذن الله فى الحلقة 11 بإذن الله فى هذه الدورة دورة خطوة أولى إلتزام بعد ما نورت بقى نبدأ ندخل بقى فى الشبهات اللي اتأثرت جوانا والخوف على الأمن والرزق اللي مدفون فى أعماق أعماقنا نبدأ بقى بعد ما نورت تعالوا ندخل جواكى تعالى بقى نفتح قلبك ونفتح قلبك وندخل جوا المشاكل اللي فيه ونعالجها ونطهرها فى التلت التالت من سورة العنكبوت ترابط فى غاية الروعة يعنى تماسك وترابط موضوعي فى غاية الإعجاز .

النهاردة بقى يا جماعة الإستخلاصات العظيمة والبصائر والحقائق والأنوار التى خرجنا بيها من المرة السابقة النهاردة هناخد حاجتين درس النهاردة ملخصه كلمتين **الحصون الوهمية والحصون الحقيقية**

- **الحصون الوهمية "مَثَلُ الَّذِينَ اتَّخَذُوا مِنْ دُونِ اللَّهِ أَوْلِيَاءَ كَمَثَلِ الْعَنْكَبُوتِ"** يعنى مثل عمر ما حد استعمله قبل القرآن مثل عجيب جداً يا جماعة إن القرآن يجيب العنكبوت ويشبه أمريكا بيه ويشبه مفاعل ديمونه النووى بتاع إسرائيل بيه ويشبه المفاعلات النووية والقنابل الهيدروجنية والنص مليون موقع إباحى وقنوات الكليبات وبرامج التوك شو المرعبة المتلاعبون بالعقول ويشبه كل دول ويجمع التشبية ده كله ويجمع حالة الشباب المفتونين بالغرب اللي وقعوا فى براثن الشباك بتاعتهم ويجمع أهل الباطل اللي مغرورين بنفسهم اللي فاكرين إنهم فى حصون اللي فاكرين إن هما محمين اللي فاكرين إنهم فى حصون عظيمة ، ولما جه أمر الله الكل اكتشف إن كان كل اللي حواليه ده خيط عنكبوت لم يغني عنه من الله شيئاً تشبية مهول يا جماعة هنقف معاه دلوقتى .
- يبقى دى الحصون الوهمية ربنا بيقول لنا شفتوا بعد قصص الأنبياء او عوا تتخدعوا فى أهل الباطل او عوا تفتكروا إنهم أقوياء او عوا تفتكروا إن سجونهم ومعتقالاتهم واستدعانتهم وتهديدتهم والمنظر المنفوخ اللي بيحاولوا يظهروا

ببيه او عوا تفتكروا إنهم أقوياء او عوا تتهزوا لما تشفوا أهل الباطل بيتنفشوا  
قدامكم مش دي حقيقتهم والله، والله ما دي حقيقتهم ولا يملكو من الأمر شئ .

الجزء التانى فى درس النهاردة الحصون الحقيقية أمال يارب الحصون الحقيقية ايه  
أومال يارب لما دي حصون وهمية أومال يارب لما طلع شبكة، الشبكة العسكرية  
الجبارة والإمكانيات الدنيوية الجبارة والشبكة الإعلامية الجبارة اللي فى إيد أهل الباطل  
لما طلع كل ده وهم لما طلع كل ده سراب لما طلع كل ده صفر أمال يارب

- **الحصون الحقيقية** هي ايه ؟ **خَلَقَ اللَّهُ السَّمَاوَاتِ وَالْأَرْضَ بِالْحَقِّ ۗ إِنَّ فِي ذَلِكَ لَآيَةً لِّلْمُؤْمِنِينَ \* اَتْلُ مَا أُوحِيَ إِلَيْكَ مِنَ الْكِتَابِ ۗ**  
**خَلَقَ اللَّهُ السَّمَاوَاتِ وَالْأَرْضَ بِالْحَقِّ ۗ** "ده التدبر فى الكون **اَتْلُ مَا أُوحِيَ إِلَيْكَ مِنَ الْكِتَابِ** "ده التدبر فى القرآن ، الكون والقرآن آيات الله الكونية وآيات الله  
القرآنية سبحانه الله العظيم يا جماعة وبعد كده **"وَأَقِمِ الصَّلَاةَ"** وبعد كده **"وَلَذِكْرُ اللَّهِ أَكْبَرُ"**

الحصون الحقيقية هي القرآن هي الصلاة هي الذكر هي التدبر مصدقين ربنا

يارب حصون يارب دي دروشة استغفر الله العظيم وأتوب إليه أنا بتكلم على الناس اللي  
إيه اللي بتنظر بمنظور والعياذ بالله إلحادى أو منظور علمانى هي دي مش دروشة  
صلاة وذكر وقرآن إحنا عايزين القوة الحقيقية عايزين إمتلاك الأسباب أنت عايز تواجه  
الـ400 مليار دولار اللي أمريكا بتصرفهم على الجيش بتاعها كل سنة بالصلاة والذكر  
أنت عايز تواجه مفاعل ديمونه والقنابل الهيدروجنية والفتنوم والمراج والمركافا عايز  
تواجه كل ده بالتدبر فى الخلق وبورد القرآن أنتوا بتتكلموا إزاي علشان كده ربنا  
بيقول فى الآخر **" وَاللَّهُ يَعْلَمُ مَا تَصْنَعُونَ "** كأن العبادات دي ، أصحاب العبادات دول  
هم صناع الحياة الحقيقيين دي مش دروشة يا جماعة فكر العبادة مش دروشة دي  
الصناعة الحقيقية للحياة العبادة هي أعظم صناعة للحياة وأعظم سبب لتغير مجرى  
الحياة كلها زي ما هناخد دلوقتي بإذن الله فى هذا اللقاء اللي الفكرة بتاعته أنا قلبى  
مستمع بيها والله يا جماعة وأنا بتكلم معاكوا مستمع واحنا دلوقتي ربنا ببصيرنا بقى  
بعد كل اللي فات من السورة ايه الحصون الوهمية واه الحصون الحقيقية عشان  
تتطلع بالإيمان والبصيرة كده يلا نكمل التلت اللي بعدها إن شاء الله بإذن الله .

### **الحصون الوهمية**

**"مَثَلُ الَّذِينَ اتَّخَذُوا مِنْ دُونِ اللَّهِ أَوْلِيَاءَ كَمَثَلِ الْعَنْكَبُوتِ"**

مثل يعني تمرين مشهور مثل يعني حاجة حصلت كتير قوي حاجة اتكررت كتير قوي  
بس مفيش حد بتعلم مفيش حد راضي يصدق مفيش حد حتى من أهل الباطل راضي  
يعتبر الكل مصمم إنه هو يبقى عبرة الكل مصمم إن هو يبقى العبرة عشان كده ربنا

بيقول في آخر الآية **وَإِنَّ أَوْهَنَ الْبُيُوتِ لَبَيْتُ الْعَنْكَبُوتِ لَوْ كَانُوا يَعْلَمُونَ** " المفسرين هنا قالوا كلام يعنى أنا أنا قلبى استمتع بيه وأنا بقراه قالك يعنى إيه لو كانوا يعلمون قالوا لو كانوا يعلمون حقيقة وضعهم يعنى قالك إن أهل الباطل هم أنفسهم مش مشخصين الضعف اللي هم فيه يعنى هو مش بس بيحاول يتنفش قدامك ويحاول يوهم الدنيا إنه ياما هنا ياما هناك هو فاكِر إنه قوي هو فاكِر إنه متحصن ، كل واحد فيهم مغرور في الأسباب اللي في إيديه ، مغرور في الكرسى اللي قاعد عليه ، مغرور في الرتبة اللي فوقه ، مغرور في الدول الكفرية اللي هو مواليها ، مغرورين في الأسباب اللي في إيديهم متهيأ لهم إنها حاجة لو كانوا يعلمون حقيقة الوضع الذى هم فيه ، وحقيقة الضعف الذى هم فيه ، وحقيقة الفقر وحقيقة الجهل الذى هم فيه يبقى ده مثل مثل مفيش حد بيتعلم

**"مَثَلُ الَّذِينَ اتَّخَذُوا مِنْ دُونِ اللَّهِ أَوْلِيَاءَ"** اللي استقوا ببعض بقى استقوا بالباطل واستقوا بالأسباب **"كَمَثَلِ الْعَنْكَبُوتِ اتَّخَذَتْ بَيْتًا"** بيت العنكبوت يا جماعة علمياً بيت مرعب يعنى فيه صورة لجمعية العنكب الأريكية شفتها عنكبوت ماسك في إيدى عنكبوت تانى وقاعد يرجع ورا كده فالصورة شرحينها تحتها قال إن اللي بيرجع لورا ده الذكر والأنثى هي صاحبة البيت أصلاً فالذكر بعد ما لقح الأنثى فالذكر عايز يخرج فهو عارف إنه هو لو ماخدش باله الأنثى هتقتله وهتاكله ، شوفوا المشهد العلمى فبيرجع وهو ماسك إيديها الأدمانية ها ماسك أطرافها الأدمانية عشان متلتاهيموش ومتغالوش ومتخونوش من ضهره لو إداها ضهره .

شفتوا يا جماعة حقيقة الناس دي مع بعض الناس دي هي اللي بتقتل بعض في الآخر الناس دي هي اللي بتقضي على بعض في الآخر الناس دي ربنا بيسلطها على بعض في الآخر ، الدعاء اللي احنا ساعات يعنى إيه بنبص له ونقول لأ اللي هو اللهم أهلك الظالمين بالظالمين وأخرجنا من بينهم سالمين ونتريق في الآخر ونقول وخلينا يارب كده قاعدين يعنى كأن ده دعاء التنبله يا جماعة ده سنة فعلاً ربنا بيهلك الظالمين بالظالمين في النهاية ربنا بيسلطهم على بعض ، عشان كده أوهن البيوت بعض التفاسير قالوا أوهن أى أعظم موتاً يعنى بيت كله بيقتل في بعضه كله بيغتال في بعضه كله بيخون في بعضه بيت مليان خيانات .

طب ما دام قلنا كمثل العنكبوت يبقى لازم هنا نجيب ثلاث حاجات مين هو العنكبوت ؟ وإيه هي الحشرة اللي وقعت في شبك العنكبوت ؟ وإيه هي خيوط العنكبوت ؟

**إيه هو بيت العنكبوت؟** يبقى ده التشبية المركب مين هو العنكبوت ؟ العنكبوت أمريكا ، العنكبوت اليهود، العنكبوت الظالمين الموالين لأهل الباطل في بلاد الإسلام ،العنكبوت هم الظالمين والأذيال بتاعتهم في بلادنا دول العنكبوت اللي فاكرا إنه متحصن . طب إيه هو الحصن بتاعه بقى **إيه الخيوط** إيه الخيوط اللي فاكرها حصن إيه البيت القنابل الأسباب الدنيوية القوة الإقتصادية القوة الإعلامية السيطرة على أذهان الناس فى زمان الخديعة شبكة الشهوات النص مليون موقع قدر الكليبات شبكة الفجور والشهوات يبقى الأسباب الدنيوية والشهوات اللي مواقعين فيها الناس . طب **مين الحشرة اللي بتقع فى خيط العنكبوت؟** أنت وأنتِ، الشاب والفتاة، الشباب اللي واقع، كام شاب دلوقتى قاعد فى خيط العنكبوت بتاع المواقع الإباحية ؟ كام شاب دلوقتى قاعد على القهوة وقاعد يفكر يهاجر إزاي ويسيب مصر ليه يقولك ياعم بره الحضارة ، بره الدنيا، بره المتعة، بره الغنى، بره الأسباب ياعم اللي يعيش فى مصر ولا يعيش فى البلاد العربية بدون ما يكون عنده عذر قهري ده يبقى إنسان مش عاقل ليه؟ مفتون بالغرب واخذ الغرب هم القدوة اوعى تبقى أنتِ الحشرة دي اوعى تبقى أنتِ الحشرة اللي وقعت فى خيوط العنكبوت ولف عليها الخيوط بتاعته وحقنها حقنة سم وبقت بعد ما كانت مننا ومن بلاد الإسلام بقت بتفكر بفكر علمانى او عوا تتهزوا او عوا تظنوا فيهم القوة او عوا تتخدعوا فيهم يبقى شوفوا التركيب ده بقى الرهيب ده يا جماعة

**وَأَنَّ أَوْهَنَ الْبُيُوتِ لَبَيْتُ الْعَنْكَبُوتِ لَوْ كَانُوا يَعْلَمُونَ** " يبقى دول الظالمين اللي عملوا حوالين نفسهم حصون من القوة الزائفة وظنوا إن الحصون دي هتحميهم من عذاب ربنا لما يجي فلما جه العذاب اكتشفوا إن كل اللي كانوا فيه ده خيوط عنكبوت ، او عوا يا شباب تبقى أنتوا الحشرة اللي بتقع فى خيط العنكبوت وبتتحقن حقنة سم وبتتفتن بهذا الخيط وبهذا الحصن وبتروح وبتضيع لما بيجي العذاب على خيط العنكبوت باللي فيه .. دي الحصون الوهمية فوقوا اعرفوا إن أهل الباطل ملهمش أي قوة او عوا قلوبكم تتعلق بيهم أو او عوا قلوبكم تنبهر بقوتهم أو تخاف منهم .

### الحصون الحقيقية

الحصون الحقيقية بقى الحصون الحقيقة آية 44 وآية 45  
آية 44 **"خَلَقَ اللَّهُ السَّمَاوَاتِ وَالْأَرْضَ بِالْحَقِّ"** التدبر فى الكون آية 45 **"أَتْلُ مَا أُوحِيَ إِلَيْكَ مِنَ الْكِتَابِ"** يبقى دي آيات الله الكونية ودي آيات الله القرآنية، ودي آيات الله القرآنية يبقى ده الكون وده القرآن أعظم سبيلين للوصول إلى الله سبحانه وتعالى

## الحصن الأول التدبير

"خَلَقَ اللَّهُ السَّمَاوَاتِ وَالْأَرْضَ بِالْحَقِّ" يعني إيه بالحق ؟

- بالحق أي لها **مقصد** يعني مفيش حاجة في الكون ملهاش مقصد كل شيء في الكون له مقصد إשמعني أنت اللي مبيقاش ليك مقصد ، إשמعني أنت اللي مبيقاش ليك هدف ، إשמعني أنت اللي مبيقاش ليك رسالة يبقى مقصد اعرفوا إن كل حاجة ليها مقصد .
- تاني حاجة بالحق ليها **تمن** مش ليها مقصد بس يعني إيه ليها تمن؟ يعني لما أقولك مثلا من يأخذ هذا السيف بحقه، حقه يعني يدفع تمنه عايز عربية دي طب هات حقه ادفع تمنها فيه تمن او عوا تفتكروا إن آيات ربنا الجبارة اللي حوالينا والفرصة اللي ربنا اداها لنا دي من غير تمن لأ دا فيه تمن التمن ده إنكوا تعبدوا ربنا إنك تعبدية إنك تعبده طب لوأنت لو مدفعتش التمن خلاص أنت حر **كُلُّ أَمْرٍ بِمَا كَسَبَ رَهِينٌ** " رهين ده يعني زي الرهينة مش هيفكه غير العمل الصالح "لاتزول قدم عبدٍ حتى يسئل عن أربع" يبقى ده رهينة مش هيفكه غير العمل الصالح

" **إِنَّ فِي ذَلِكَ لَآيَةً لِّلْمُؤْمِنِينَ** " يعني إيه " **إِنَّ فِي ذَلِكَ لَآيَةً** " يعني يا جماعة التدبير الحي الفعال ، التدبير الفعال فيه ناس تقعد تبص كده كنت مع بعض إخواني ارجع معاه من جلسة الضحى وأنا طالب ففي صورة كده كان معلقها محل لشمس طالعة على بحر والبحر فيه زي صخرة كده في النص وأيام ما أنا كنت طالب مكانش فيه بقى التنت والصور الطبيعية الرهيبة دي فالمنظر كان بيشدني جدا وأنا وخارج من جلسة الضحى كل يوم أفضل واقف قدام المحل شوية كده منظر جميل إبداعى سبحان الله العظيم فصاحبى كان يقف جنبى كده يقولى هو ده المنظر فيه إيه يعني إيه اللي فيه أنا مش شايف حاجة افكر قول الله **وَكَذَلِكَ نُرِي إِبْرَاهِيمَ** " هي القضية إن ربنا يوريك إن ربنا يوريكي كله بينظر نظر العين ولكن مين اللي ربنا هيوريه فعلا وهيفتح قلبه على عظمة هذه المشاهد **إِنَّ فِي ذَلِكَ لَآيَةً لِّلْمُؤْمِنِينَ** " مش أى حد هينتفع إلا اللي في قلبه إيمان بالله ويقين بالله سبحانه وتعالى ، التدبير يا جماعة لما بروح مع إخواني هذه الأيام التدبير في أماكن خلوية بحس إن التدبير ده عبادة ممكن تقلب حياتك فعلا ممكن تقلب حياة أي إنسان مننا بس يقف ويفكر عشان كده المواطن اللي القرآن تكلم فيها عن عبادة التدبير مواطن غريبة جدا هنا في سورة الفتن وسط الفتن الرهيبة ربنا يتكلم عن التدبير يعني واحد جاي يقولك فتنة النساء وهضيع وبتكلمنى وهتفتنى ومش قادر وبقع في معاصي تقوله روح تدبر في خلق الله يقولك إيه أعمل إيه تدبر في خلق يا جماعة عبادة التدبير عبادة بتقلب حياة اللي بيعملها بتفتح القلب على معاني معرفة الله بتخليكي تعرفي من هو المخلوق لما بتبصي للخالق ، إحنا لما شوفنا الأهرام عرفنا اللي بنوها

أقوياء ، لما شفنا الموبايل عرفنا اللي صنعه عبقرى أو الكمبيوتر اللي يشوف خلق الله يعرف مين هو ربنا يعرف مين اللي خلق ده عشان كده تلاقوا التدبير مواطنه غريبة فى القرآن يعني مثلا " **إِنَّ فِي خَلْقِ السَّمَاوَاتِ وَالْأَرْضِ وَاخْتِلَافِ اللَّيْلِ وَالنَّهَارِ لَآيَاتٍ لِأُولِي الْأَلْبَابِ** " جاية بعد الستين آية بتوع هزيمة أحد فى سورة آل عمران يعني الصحابة راجعين مصعب اتقتل وحمزة اتقتل وعبدالله بن جحش اتقتل وسعد بن ربيع الأنصارى اتقتل وعمار بن يزيد السكنى اتقتل 70 قتيل من عواميد إقامة الدين فى الأرض الصحابة راجعين قلبهم مدبوح ربنا ينزلهم " **إِنَّ فِي خَلْقِ السَّمَاوَاتِ وَالْأَرْضِ وَاخْتِلَافِ اللَّيْلِ وَالنَّهَارِ** " كأن لو أنت حزينه لو أنت مهموم لو أنت راح عليك صفقة بمليون جنية عايز قلبك يرجع تعمل restart لنفسيتك وقلبك روح تدبر ، يا عم أنت بتقول إيه؟! يا عم الكلام ده فى القرآن يا إخوانا إحنا اللي معزولين عن آيات ربنا إحنا اللي محدش علمنا من وإحنا صغيرين إن إحنا نبص للشمس ونسبح إن إحنا نبص للقمر ونسجد إن إحنا تبص للقمر وهو منور كأن قلبك بيستحمى فى نهر من النور إنك تبص للبحر الأحمر تقول يارب هو شق البحر لموسى آية أعظم من البحر نفسه هو شق القمر لسيدنا محمد آية أعظم من القمر نفسه نفوق يا جماعة نفوق لما نشوف منظر الطير بيرفر الرفرفة دي كانت فى البيضة و الصوصوة كانت فى الريش كان فى المجتمع بتاع الطيور و هم بيطيروا على شكل ثمانية و القائد بتاعهم بيطيروا قدامهم و لما بيتعب بيرجع ورا و ييجى واحد تانى يتقدم و لما واحد يتعب فى السرب و مش قادر يكمل اتنين يفصلوا معاه علشان يفضل روح الفريق ميسيبوش أخوهم و يتخلوا عنه فى نص طريق الهجرة فى الكلام ده يا جماعة؟ التدبير فى خلق الله ، يبقى زي ما ربنا فى سورة الروم " **وَمِنْ آيَاتِهِ أَنْ خَلَقَكُمْ مِنْ تُرَابٍ** " و " **وَمِنْ آيَاتِهِ أَنْ خَلَقَ لَكُمْ مِنْ أَنْفُسِكُمْ أَزْوَاجًا** " متى؟؟؟ " **غَلِبَتِ الرُّومُ** " و **وَهُمْ مِنْ بَعْدِ غَلِبِهِمْ سَيَغْلِبُونَ** " بعد الحرب العالمية يعني مش بعد ثورة 25 يناير نقول للناس بس عشان تتوازنوا قلبيا كده روحوا جلسة تدبر التدبير بيديك اتزان نفسي فى الحياة التدبير بيملى قلبك سكينه و استبشار لأنه بيوصل قلبك بمعرفة الله يبقى ده الحصن الحقيقي الأول

### الحصن الثانى القرآن

" **اتْلُ مَا أُوحِيَ إِلَيْكَ مِنَ الْكِتَابِ** " طيب اتل كان المتوقع إن ربنا يقول اتلوا يا أمه محمد تيجى واو الجماعة إنما ربنا قال اتل بالمفرد بيكلم النبي لوحدته طيب بيكلم النبي ليه هو ربنا يقصد فى الآية سيدنا محمد بس اللي يطبقها؟ لا طبعا ده ربنا بيقول " **إِنَّ الصَّلَاةَ تَنْهَى عَنِ الْفَحْشَاءِ وَالْمُنْكَرِ** " هو النبي بيعمل فحشاء و منكر؟ الآية ده لينا إحنا اصلا ،

أومال سيدنا محمد جات ليه اتل و أقم الصلاة؟؟ يعني سبحان الله العظيم هي لينا كلنا بدليل إن ربنا قال في الآخر **" وَاللَّهُ يَعْلَمُ مَا تَصْنَعُونَ "** مش ما تصنع يعني كل أعمالكم الصالحة تحت علم الله كل العبادات اللي أنتم بتصنعوا بيها الحياة و بيتغيروا بيها الحياة تحت علم الله أومال ربنا قال اتل ليه؟؟ عشان يا جماعة في فترات الفتن في فترات الأزمات لازم القائد يبقى قدوة لازم الداعية اللي على المنبر ينزل من على المنبر و يروح يزور المرضى في المستشفى و يروج الملجأ يزور الأطفال اليتامى و ينزل يروح لبیت أخ مسكين يعوده و هو مريض و ينزل يوقف الشباب اللي على القهوة يكلمهم عن ربنا ، لازم القائد يبقى قدوة لازم رجل الدين يبقى قدوة ، الناس في فترة الأزمات بتبقى مش محتاجة كلام مش قادرة عايزة أفعال عايزة قوة عايزة أفعال تقودها مش عايزة أقوال عشان كده ربنا في الفترات الصعبة كان يكلم النبي بصيغة المفرد **" فَاسْتَقِمْ كَمَا أُمِرْتَ "** في سورة هود اللي كلها تهديدات لأهل الحق ليه؟ لأن لازم النبي يبقى هو القدوة في الاستقامة و في الاستمرار في هذا الوقت ، ربنا يقول للنبي **" فَذَكِّرْ بِالْقُرْآنِ مَنْ يَخَافُ وَعَيْدٍ "** في سورة ق في عام الحزن ليه؟ لأن في عام الحزن محدش قادر يشتغل في الدعوة زي الفترات اللي احنا فيها دي الإخوة و الأخوات مش قادرين يشتغلوا في الدعوة من الاحباط و من الواقع الصعب الرهيب اللي احنا عايشين فيه ، لازم الداعية يبقى داعية ميداني عشان الصف يبقى دعاه ميدانيين يبقى لازم نتحرك عشان الناس تتحرك **" وَأَدِّنْ فِي النَّاسِ بِالْحَجِّ "** انزل و اشتغل **" يَا تُؤَكِّرُ رَجَالًا "** هم ييجوا لو الداعية تحرك الناس هتتحرك لو الداعية تحرك الإخوة و الأخوات هيتحركوا يبقى لازم القائد يبقى قدوة.....معانى خطيرة جدا

مش ملاحظين يا جماعة إن كل كلمة بتفتح قلوبنا و بتفتح بصائرنا و بترسم لينا خط سير

### الحصن الثالث الصلاة

**" اَتْلُ مَا أُوحِيَ إِلَيْكَ مِنَ الْكِتَابِ وَأَقِمِ الصَّلَاةَ "** يبقى بعد القرآن الصلاة

**" إِنَّ الصَّلَاةَ تَنْهَى عَنِ الْفَحْشَاءِ وَالْمُنْكَرِ "** تنهى دي فيها قوة أنت عارف بالظبط كده زي بودي جارد واقف على باب فواحد جاي يدخل قاله محدش داخل ينهيه عن الدخول معناه إن الصلاة دي قوة جبارة بس لو صح لو صلينا صح ، واحد من إخواني كان فاتح مشروع معصية شديد جدا ربنا يحفظنا و فجأة أنا كنت بخاف أصلا أكلمه في الدين هذا الشاب و فجاه التزم و بقى طلقه في الدعوة و بقى قبله في الدعوة فبقوله أنت التزمت إزاي مفيش حد دعاك قال عارف أنا التزمت إزاي؟ صليت صح . بس هو ده اللي قالهولي صليت صح فلقبت قلبي اتغير اه لو صلينا صح **" إِنَّ الصَّلَاةَ تَنْهَى عَنِ "**

**الْفَحْشَاءُ وَالْمُنْكَرُ** الصلاة قوة تغييرية كبيرة و لكن لو صح **"وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ"** يبقى هنا القرآن و الصلاة و الذكر

### الحصن الرابع الذكر

يبقى يعني إيه **"وَلَذِكْرُ اللَّهِ أَكْبَرُ"**

- المعنى الأول : أى أن ذكر الله في الصلاة أكبر في النهي عن الفحشاء و المنكر يعني الصلاة بتنهى عن الفحشاء و المنكر و أنتوا عارفين اكبر حاجة فى الصلاة بتنهى عن الفحشاء و المنكر إيه هى الذكر علشان كده كتروا أوى من التسبيح و الذكر في الصلاة فهمتوا المعنى ؟ يبقى المعنى الأولانى املوا الصلاة بالذكر طيب و المعنى الثانى : أن ذكر الله أكبر شئ ينهى عن الفحشاء و المنكر يعني أكبر من الصلاة لا العلماء هنا قالوا كلمة جميلة أوى قالوا ده أفعل تفضيل مسلوب المفاضلة يعني إيه مسلوب المفاضلة ؟ يعني مش معناه إن الذكر أكبر من الصلاة عارفين لما اقولك مثلا إيه ليس عمل أنجى من عذاب الله من ذكر الله يعني فيه أفعال معناها إن الذكر ده كبير أوى الذكر ده أثره في النهي عن الفحشاء و المنكر عظيم أوى **"وَلَذِكْرُ اللَّهِ أَكْبَرُ"** يبقى أسلوب إيه ؟ تفخيم قيمة الذكر في النهي عن الفحشاء و المنكر و لكن مسلوب المفاضلة مش معناه إنه أعظم من الصلاة
- المعنى الثالث: ذكر الله في القلب يعني ثمرة الصلاة القلبية بقى إن الصلاة أثرت على قلبك و على قلبك فبقى ربنا فى قلبك دائما قلبك لا ينسى الله قلبك لا ينسى الله الثمرة القلبية دى هي أكبر حاجة بتخلي لما المعصية تعرض عليك لا تقبلها ليه ؟ لإن ربنا فى قلبك لغن ربنا فى قلبك دائما أنت لا يغيب اتصال قلبك بالله فدى الثمرة القلبية

**"وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ"** ما تصنعون يبقى العبادة يا جماعة صناعة

حياة العبادة مش دروشة يا إخواننا عشان كده المعلومة اللى أنا عايز أقولها هنا خطيرة جدا هي إن علاقتك بآية 44 و 45 هي إيه ؟؟ علاقتك بآية التدبر و القرآن و الصلاة و الذكر إيه ؟ العلاقة بتاعتنا بالآيات دول الحصون الحقيقية احنا قلنا الحصون الوهمية آية 41 ، الحصون الحقيقية آية 44 و 45 دي الحصون اللى فعلا هتنجيك دي الحصون اللى فعلا ربنا هيحفظك بسببها دي اثباب الثبات من موسوعة الفتن بتاعة سورة العنكبوت مش احنا قلنا دي دورة موسوعة مشاكل الملتزمين و الملتزمات دي دورة خطوة أولى التزام دي دورة موسوعة الفتن اللى بتقابلك في الطريق عدة الثبات في الفتن دي هي دي الحصون الحقيقية دي اللى مش هينزل عليك عذاب بهذه

الحصون دي اللي مش هيوصلك أهل الباطل العبادة سبب للحفظ من القوم الظالمين  
سبب للحفظ من أهل الباطل

### علاقة الإخوة و الأخوات بالآيتين 44 و 45 حاجتين :

- 1- يا إما علاقة عواطف يعني إيه عواطف ؟ يعني علاقة مشاعر ده يا عيني إنسان  
بائس مسكين يعني إيه ؟ يعني علاقته بالآيات دي علاقة مشاعر آه التدبر جميل آه  
الصلاة دي جميلة نفسي اخشع نفسي علاقة مشاعر و ساعات يلقط و ساعات ..
- 2- و فيه علاقة تانية علاقة أورد يعنة إيه علاقة أورد ؟ يعني التدبر ده ورد في حياته  
يا إخواننا فوقوا استيقظوا أو موتوا التدبر ده ورد التدبر ده مش طلعة مش فرقه  
حصلت في حياتها مرة قامت جايه موسوعة ال bbc بعد ما شالت الموسيقى منها و  
قعدت بقى تتدبر في الكون أو جاب فيلمين بقى من أفلام هارون يحيى بعد ما فصل  
المزيكا منها و قعد يتدبر في الكون أو بعد ما قفل صوت الموسيقى و قعد يتدبر في  
المشاهد الكونية أو جابت صور طبيعية للشروق و الغروب و قعدت تعيط و بعد كده  
زهقت ، ورد يعني كل أسبوع عصر الجمعة من العصر للمغرب تدبر خلاص ده ورد  
طيب ده ورد التدبر ، وورد القرآن القرآن ده ورد يا جماعة يـا ر ب ثبتنا على  
تلاوة القرآن يـا ر ب آناء الليل و أطراف النهار على الوجه الذي يرضيك عنا يا  
رب ، ورد الصلاة إن أول ما بيسمع الله أكبر بيلبي فوراً إن الصلاة دي ورد ، الذكر  
ورد الذكر إن بيقد جلسة الضحى كل يوم .

يبقى العلاقة بالعبادة صارت إيه صارت أورد يبقى دي الحصون الحقيقية كان من غير  
تدبر و قرآن و صلاة و ذكر مش هتقدرى تستحلى مش هتقدرى تكملى مش هتقدرى  
تثبتى ، الآية بتقولكم خليكوا عمليين خليك إنسان عملي خليك إنسان لازم يكون ليك  
أورد عبادة ثابتة في حياتك عشان توصل لشط النجاة دي الحصون آه .

طيب ده يفكرك بقول الله إيه ؟ قول الله في وصف أبي بكر الصديق في سورة الليل  
**"فَأَمَّا مَنْ أَعْطَى وَاتَّقَى \* وَصَدَّقَ بِالْحُسْنَى"** أحد أقوال العلماء بيقول إيه صدق  
بالحسنى أى صدق بالأعمال الصالحة أى صدق بالعبادات يعني إيه ؟ يعني يقينه جه  
على الأعمال و ليس على المال يقينه جه على الأعمال الصالحة و ليس على الأسباب  
يقينه جه على إن العبادة هي سبب الفرج ، العبادة هي سبب الفتح ، العبادة هي سبب  
السعادة ، العبادة هي سبب الحفظ من الظالمين و تهديداتهم ، العبادة هي السبب إن  
ربنا يفتح عليك في شغلك في الدعوة و يفتح قلوب الناس ليكي

فكر العبادة يا جماعة سيدنا يوسف قعد عشر سنين يعبد ربنا في السجن خرج ربنا  
اداله مصر في عشر دقائق اداله مصر على صينية فضة

سيدنا داوود كما يعبد ربنا من الفجر للمغرب يسبح ربنا اداله الملك و هو عنده 31 سنة  
مؤسس دولة اليهود و هو عنده 31 سنة

سيدنا يونس **"فَلَوْلَا أَنَّهُ كَانَ مِنَ الْمُسَبِّحِينَ لَلَّيْتُ فِي بَطْنِهِ إِلَى يَوْمِ يُبْعَثُونَ"** بسبب  
عبادته و تسبيحه و صلاته يعني العبادة و صدق بالحسنى

عاوزين نخرج بالمعنى ده **و صدق بالحسنى** نصدق إن العبادات هي الحصون  
الحقيقية

أنا مستمتع يا جماعة و أنا بتكلم النهارده عن الدرس بتاعنا اللي بيتكلم عن الحصون  
الوهمية و الحصون الحقيقية عشان هندخل من أول المرة الجاية بقى من أول **"وَلَا  
تُجَادِلُوا أَهْلَ الْكِتَابِ"** اللي هو الشبهات بقى هنرجع تــــــانى لموسوعة مشاكل  
الملتزمين و الملتزمات هنبدا بالشبهات بقى اللي لطش معاه موقع إحدى اللي لطشت  
معاه شبهة في وجود الله اللي لطش معاه و لا اللي لطشت معاه شبهة في التصير و لا  
شبهة في الربوبيين و لا شبهة من العلمانيين الشبهات بقى يا جماعة و إزاي إن احنا  
نتخلص من الشبهات الطريق إلى اليقين كيف نصل إلى اليقين كيف نرد على أهل  
الشبهات زي أول سورة ق كده يعني زي ما هنقول يعني سبحان الله العظيم منهج الرد  
عليهم عشان نبين أخطاء بعض المناهج في الرد عليهم الآن

إن شاء الله بإذن الله بعد ما نورت بقى بعد ما خلاص بقى قلوبنا مع ربنا و عرفنا إن  
طريق ربنا هو طريق النجاة هندخل المرة الجاية بقى في استئناف بعد اليقين و  
البصيرة بقى هندخل في الموانع الداخلية الشرسة و الفتن الداخلية الشرسة اللي هي  
فتنة الشبهات و الخوف على الأمن و الخوف على الرزق و الخوف على المحبوبات  
الدنيوية

دلوقتي يا إخوانى أنا كلفتكم في درس سورة العنكبوت إنكم تعملوا بحث لماذا لا يلتزم  
الشباب و البنات إيه السبب إن العصاة مش عاوزين يلتزموا ؟ و فعلا أنا جالى أبحاث و  
منها بحث لماذا لا تلتزم بتاع بطاعة ربي تسمو حياتى لو حد متابع معانا على الشاشه  
أنا عاوز أعرف بطاعة ربي تسمو حياتى لأن هي مش طالبة في سنة تانية فهل هي في  
سنة أولى و لا بطاعة ربي تسمو حياتى مش طالبة موجودة معانا , يعني دي نقطة  
يعنى عاوز اعرف هي في سنة إيه معانا بالظبط ؟ بطاعة ربي تسمو حياتى لإن أنا  
قتلتكم يا جماعة اللي يجيب بحث يجيب اسم اللي عمل البحث سواء فرد أو فريق و  
يجيب أنهى دفعة من الدفع و فيه بحث تاني لماذا لا يلتزم الشباب إعداد و لربك فاصبر  
طالب أو طالبة في سننى أولى أنا بسأل ليه عن الدفعى لأن أنا نفسى اكتشف سنة أولى  
يعنى أنا لسه كنت بتكلم دلوقتي فى الدروس بتاعة سنة تانية بكلم سنة تانية بقولهم أنا

نفسى نكتشف سنة أولى نفسى نفجر الطاقات اللى جوا طلبه و طالبات سنة أولى نفسى نطلع كوادر منهم و نفسى نحتضنهم و نبنيهم و كلنا نتشارك في البناء بتاعهم

عموما البحث لماذا لا تلتزم بتاع بطاعة ربي تسمو حياتى أنا بصراحة البحث عجبنى جدا يا جماعة البحث أثر فيا الأسلوب دعوي الأسلوب بتاع الأخت واضح إن هي شغالة في الدعوة لإن أسلوب كلام جولات يعني إن شاء الله بإذن الله أنتوا عارفين إننا هنعمل سيكشن في سورة العنكبوت هيمسكه دكتور أحمد سعد بإذن الله سبحانه و تعالى هو قاعد معانا دلوقتي في مكان التصوير إن شاء الله هيمسك سيكشن سورة العنكبوت و سيكشن تحضير كلمات دعوية هيبقى فيه سكشنين سيكشن تبع مادة الليالى القرآنية اللى انا بدرس فيها دلوقتي سورة العنكبوت بإذن الله سبحانه و تعالى يعنى إن شاء الله بإذن الله هيمسك السيكشن بتاعه و هو اللى هيمتحنكم عليها ، السيكشن التاني في مادة في فن الدعوة هيمسك سيكشن تحضير كلمات هيدر بكم على تحضير الكلمات و هيتابعكوا فيها و هيتابعكوا في أنكوا هتدوها سواء على أنت سواء في مجموعة سكايب مغلقة بينكم في أى مكان بس لازم تتعودوا أنكوا تحضروا و تدوا و تفجروا الطاقات الدعوية و تبدأوا تتكلموا بأسلوب دعوي مش بأسلوب جامد أو بأسلوب صلب لا بأسلوب دعوي مرن يخترق القلوب بإذن الله .

فعجبنى الأسلوب الشبابي بتاع أختنا و أنا أنصحكم بصراحة بقراءة البحث ده و بقولكوا علشان بس نبدأ نستفيد من بعض هي بدأت البحث بمقدمة حلوة الصراحة يعني بتقول إن طريق الالتزام بالنسبة لناس كتير فيه وحوش مخيفة و لكن كل دي أفكار مغلوطة بسبب حاجات ترسخت جوا أذهاننا و أصبحت معوقات كل ما نيجي نقرب بنخاف و بنقول مش هنقدر تعالوا يا جماعة نشوف لإيه المعوقات اللى مانعانا عن طريق ربنا و قامت قابله بقى زمن صعب و لكن جائزة لا يتخيلها عقل و جابت حديث لما النبي قال إن القابض على دينه كالقابض على الجمر و له أجر سبعين من الصحابة فبتقول ياه ده كان الصحابي الواحد بأمة يعني تخيلوا بقى إن احنا بسبب الثبات دلوقتي و لو التزمنا ممكن ناخذ ثواب شكله إيه فالمقدمة كويسة و بعدين بقى ابتدت تتكلم عن الشبهات أول شبهة جابتها إن الالتزام فضل و ليس فرض ليه ربنا بيقول فمن شاء اتخذ إلى ربه منابا فمن شاء اللى عايز فردت على الشبهة بالآية اللى بعدها إنا أنذرناكم عذابا قريبا بعد كده ابتدت تتكلم عن معوقات الالتزام قالت إن المعوقات هي الشيطان و المعوق التاني هي الفتن و المعوق الثالث قالت إن الناس مش هابين عليها تسبب الدنيا يعنى حب الدنيا يعنى و الرابع قالت الصحبة و الخامس قالت المجتمع و السادس قالت الشهوات اللى هوا الهوى اللى هم سموها السلف الهوى و السابع قالت إن فيه ناس في بداية الالتزام بتعتمد على الرقائق بس فبتنموا نمو قلبى من غير ما

تكون متأسسة أساس عقائدى أو متأسسة في فهم الدين فببببى الدين بتاعها مشاعر  
بس

أنا حاسس إنها صراحة هاضمة الأفكار اللى احنا بنقولها كويس جدا حتى هي كاتبة في  
المراجع أنا بس بقول تنبيه بسيط أنا كاتبه بفهمى مش ناقله كلام علشان أكيد المصادر  
اللى ناقله عنهم أفضل كتير فى التعبير يعني لفته كويسه فبتقول المصادر المعهد  
القرآنى الدعوي و طرقات على باب التدبر للدكتور علي يوسف و سلسلة الطريق إلى  
القرآن بتاعة الترابط الموضوعي في القرآن فبتقول فعلا لما سألت الناس عرفت قيمة  
دروس سورة العنكبوت و شعرت بقيمة إن لازم أوصل اللى اتعلمته و دي كانت مجرد  
اللى هو البحث يعني كان مجرد محاولة أسأل الله أن يتقبلها و إن شاء الله باستمرار  
هحاول تعديلها كل ما اكتشف حاجة جديدة بصراحة عجبني الفكر عجبني الفكر إنها  
عاوزه تطور من نفسها فتزيد و عجبني الفكر إنها مركزة معنا جدا و مركزة مع الكلام  
اللى بنقله جدا و عجبني طريقة الكلام بتاعه أسلوب الجولات و لكن هي خلطت بين  
حاجتين فى البحث هو ده النقض اللى ليا في البحث إنها خلطت بين معوقات الالتزام  
الواقعية و بين أسباب الشباب و الفتيات في عدم الالتزام النهارده أنا لما كلمتكم يا  
جماعة قتلتم إن احنا في موسوعة الفتن في سورة العنكبوت انا عاوزكوا تقولولى  
بمصطلحات الشباب الشباب مبيلتزمش النهارده ليه فمثلا واحد يقولى إن الدين خنيق  
الشباب بيقولوا إن الدين خنيق و الالتزام خنيق و كل حاجة حرام واحد تانى يقول  
مقدرش أسيب أصحابى مش ممكن أسيب أصحابى مقدرش أعيش من غيرهم إزاي  
واحد تانى يقول لا اللى بيدخل الالتزام لازم ربنا بيتليه أو يسقطه أو يحصله مصيبة و  
أنا مقدرش استحمل إن مصيبة تحصلى واحد رابع يقول أصل أنا فيه معصية غارز فيها  
مش قادر أسببها أصل بحب بنت و أنا عارف إن لو دخلت الجامع لازم أسبب المعصية  
مش هينفع أبقى منافق ماشى في الطاعة و المعصية و أنا مش هقدر أسبب المعصية  
فمش هقدر أمشى في الطاعة واحد خامس يقول أنا لا يمكن هلنزم أنا حاولت ستين  
مرة و وقعت فأنا مش هعرف فأنا محبط و يائس و الشيطان بيقولى متقدرش و أنا  
مصدقه إن أنا مش هقدر واحدة سادسو تقول أنا دلوقتى لو لبست نقاب أو لبست حجاب  
أمهات المؤمنين أو خمار أصل جوزي و لا محدش هيتقدملى و لا جوزى هيشوف  
البنات حلوة في الشارع و أنا ماشية جنبه لابسة خيمة أنا كده مش هقدر كده يا جماعة  
ده اللى أنا طلبته

إيه أسباب الشباب و البنات في عدم الالتزام علشان نقوم ضامين الملف ده على ملف  
تفسير سورة العنكبوت و يبقى عملنا سيكشن كمان بعد الشرح إنما هي هنا ركزت على  
معوقات الالتزام اللى هو إبليس و الدنيا و نفسى و الهوى اللى هو المعوق الأول  
الشيطان المعوق الثاني الفتن المعوق الثالث الهوى لا ده مش اللى أنا قصدته خلاص و

إن كنت بقول انها فى النص اتكلمت عن الشبهات اتكلمت عن شبهة الالتزام فضل مش فرض اتكلمت برضوا من ضمن الشبهات اللى تناولتها شبهة احنا كده كده داخلين الجنة فى الآخر يعنى إيه المشكلة بقى و ردت عليها بصراحة رد حلو اتكلمت عن شبهة السخرية اللى هي الخوف من التريقة و قالت قصة أصحاب الأعراف إنهم كانوا بيتمنوا المؤمنين اللى كانوا بيتريقوا عليهم فى الدنيا النهاردة يبصلهم بس بصة سبحان الله العظيم و فى خواتيم المطففين " فالיום الذين ءامنوا من الكفار يضحكون " و اتكلمت برضوا حته مهمة جدا هى إن الاعتماد على الرقائق بس فى بداية الالتزام غلط بصراحة البحث حلو يا جماعة يعنى أنا أعطى لهذا البحث يا إما جيد مرتفع 80 % يا إما امتياز 85 % يعنى أعطى هذا البحث تقييم عالي و لولا إن هى خلطت ما بين معوقات الالتزام و ما بين الكلام العملى اللى الشباب و الفتيات ملتزموش بسببه يعنى كنا أعطيناها تقدير أعلى من كده لا يزال السيكشن مفتوح لا يزال هذا البحث العملي على هامش شرح سورة العنكبوت مفتوح عاوزكوا تبعتولى طلبة أولى و طلبة تانية تبعتولى بحث لماذا لا يلتزم الشباب و هحاول كل مرة إن أنا أناقش بحث من هذه الأبحاث إن شاء الله .

أنا عايز زى ما بقولكم كده إيه ال 15 سبب اللى الشباب مش عاوزين يلتزموا بسببهم علشان لما تيجي تكلمي بنت و أنت تكلم شاب يبقى أنت ترد عليهم من قبل ما هو يقولهم طيب هى مقالتش يبقى أنتى تطلعى اللى جواها و تكلمها و تردي على الشبهات بإذن الله تعالى فى انتظار أبحاث لماذا لا يلتزم الشباب و البنات إن شاء الله تبعتوها و دكتور محمد رفعت إن شاء الله يجيبهالى .

هنبدأ قريبا جدا خلال أيام السيكشن بتاع سورة العنكبوت و سيكشن تحضير الكلمات نتابع مع إدارة المعهد و دكتور محمد رفعت إن شاء الله علشان تعرفوا معاد السكاشن دي و تبدأوا تلتزموا بيها إن شاء الله و دكتور أحمد سعد يبقى إضافه للمعهد القرآني إضافه حقيقية إضافه تربوية بإذن الله و يبقى فيه فوايد تربوية مهمة جدا إن شاء الله تستفيدوها منه و إن شاء الله لسه فيه لإضافات فى هذا المعهد القرآني التربوي اللى احنا بنحاول بإذن الله وسط المعاهد الدينية يبقى عامل زى كمبريدج و أوكسفورد كده وسط المعاهد الدنيوية أو وسط المرافق التعليمية الدنيوية

إن شاء الله ربنا يفتح علينا ربنا يقبلنا ربنا يتولانا ربنا يقبلنا على ما كان منا الورش يا جماعة ركزوا فى الورش جيد جدا عاوزين الورش ترجع تنشط من تانى عاوزين قائدات الورش مجموعات التقويه بتاعة سنة تانية و احتضانهم و اهتمامهم بسنة أولى عاوزين نرجع تانى نحى قضية المواد العملية بتاعتنا يعنى سيكشن تحضير الكلمات ده بتاع الورش أصلا ده تبع الورش نبدا نشتغل فى الدعوة و ننزل على أرض الواقع

سبحانك اللهم و بحمدك أشهد أن لا إله إلا أنت استغفرك و أتوب إليك